

«L'ospitalitad gioga ina rolla fitg centrala»

Pled d'avertura da la sessiun da december

■ **(anr/fa) Il turissem d'enviern festivescha actualmain ses giubileum da 150 onns. Duri Campell, il president dal cussegl grond, ha deditgà ses pled d'avertura al turissem sco la pitga la pli impurtanta da l'economia grischuna.** Cun la represchentaziun dal film «150 onns turissem d'enviern a San Murezzan» ha cumenzà glindesdi a Cuira la sessiun dal parlament grischun. «Cun debattar davart il rapport dal svilup economic en il chantun Grischun vegnin nus a'ns fatschentar en questa sessiun era cun il turissem», ha ditg il president dal parlament *Duri Campell*. Il resultat dal svilup dal turissem d'enviern a San Murezzan, a Tavau ed en las autras de-

stinaziuns è stà quel che 30 perschiens da la prestaziun economica totala dal Grischun è ozendi «inducids turisticamain». Ultra da la bella cuntrada è stà tenor el in motiv decisiv per quest success dal turissem grischun l'ospitalitad, cun la quala ils giasts èn vegnids benevontads en il Grischun. Duri Campell ha punctuà ch'i na saja betg be necessari da mantegnair l'infrastructura ed ils servetschs turistics en bun stadi, a ses avis sto il giast era sa sentir bainvis en las valladas grischunas: «Per mai è l'ospitalitad ina tenuta generala che mussa la stima ed il plaschair vi da la scuntrada cun il giast.» Causa ch'ils turists cumpareglian differentas destinaziuns ina cun l'autra èn sco

ch'el ha ditg er aspects culturals d'impurtanza: «Per mai è nossa purschida culturala alura attractiva sch'ella na cuntegna betg mo occurrenzas d'art, musica ed auter pli, mabain sch'ella pussibilescha als turists da prender part e da vegnir integrads en nossa vita dal minga di», ha ditg il president dal cussegl grond, «jau pens qua a nossas linguas, als tavulins, a nossas tradiziuns ed auter pli.» El ha appellà da betg perder temp cun cumbats ideologics, mabain da stgaffir las cundiziuns generalas per ch'il turissem possa restar la pitga fundamentala da l'economia publica dal Grischun. «In'ostilitad envers il turissem na'ns pudain nus simpelmain betg prestar.»